

小象行年卦气

夫小象游年之卦，乃天地日月运行之象，休咎之端，如形随影，无不应验。先天之卦与后天之卦，乃大统之数，谓之“大象”，阳爻九年，阴爻六年是也。其一年一卦者，乃先后天之游气也，故云“小象如日月推移，乃运行自然之理”。既观大象吉凶，定其大体，又必复视其流年之卦象如何，以玩其吉凶，然后可探人气数之休咎。如人必有所适也，知卦气必有所游，然后见天地运行之象，周流六虚之理，福善祸淫之机，鬼神吉凶之秘，日月亏盈之道，四时逆顺之布，星辰变化之会。其一年变一卦之法，亦自本卦之爻而始。假如同人九三爻是元堂，其阳爻九年者，此大象也。其小象当看此年是阳是阴，如此年是阳年，则不变。一岁在同人九三元爻，二岁取应爻，变同人上九为革上六，三岁复取应爻，变革九三为随六三。然后自下而上，四岁变随九四为屯六四，五岁变屯九五为复六五，六岁变复上六为颐上九，七岁变颐初九为剥初六，八岁变剥六二为蒙九二，九岁变蒙六三为蛊九三。此阳年九爻变例也。

如一岁是阴年，阴见阳则必变，此年当变为无妄六三，二岁取应爻，变无妄上九为随上六，三岁复取应爻，变随六三为革九三。然后自下而上，四岁变既济六四，五岁变明夷六五，六岁变贲上九，七岁变艮初六，八岁变蛊九二，九岁变蒙六三。此同人九三阴年小象九年变例也。

至十岁换九四爻，当看其年或阴或阳，如是阴年见阳必变，则将同人九四变为家人六四。十一岁变家人应爻初九为渐初六，十二岁复将渐应爻六四变为遁九四，十三变旅六五，十四变小过上六，十五变丰初九，十六变大壮九二，十七变归妹六三，十八变临六四。此是阳爻阴年变小象之法也。

如其年是阳，不变，仍用九四元爻断，次年取应爻，变同人初九为遁初六，三年又取应爻，变遁九四为渐六四。四岁挨次变去，自下而上，变渐九

五为艮六五,五岁变谦上六,六岁变明夷初九,七岁变泰九二,八岁变临六三,九岁变归妹九四。此同人九四阳爻九年变小象之法也。

凡阳爻游变,极难切,须仔细看初变之年,或阳或阴,方不差误。其阴爻六年游变,但到处自本爻挨次变去,自下而上,不必取应,亦无阴阳之分。假如同人六二爻为元堂,则一变变为乾九二,再变为履六三,三变为中孚六四,四变为损六五,五变为临上六,六变为师初六,一年变一爻为一卦。余仿此。

大象虽佳,(即所得阳爻九年,阴爻六年是也。)不若流年佳。(即小象行年爻也。)流年若佳,未有不相应之者。若流年多凶,大象身爻虽佳,亦奚以为。